



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu
Tribunál Distritál Oekusi
Períodu Outubru 2018

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida. JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba violénsia hasoru fetu.

A. Sumáriu prosesu julgamentu kazu iha Tribunál Distritál Oekusi

1. Totál kazu ne'ebé JSMP monitoriza: 19

Tipu kazu	Tipu kazu	Númeru
Artigu 145 Kódigu Penál (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika	6
Artigu 145 (KP)	Ofensa ba integridade fízika simples	3
Artigu 316 (KP)	Kontrabandu	3
Artigu 154 (KP)	Maus tratus ba kónjuje	1
Artigu 171, 176, 181, 145 no Artigu 157 (KP)	Koasaun seksuál, pornografia infantíl, aktu seksuál ho adolsente, ofensa ba integridade fízika simples no krime ameasa	1
Artigu 252 (KP)	Furtu agravadu	1
Artigu 316, 211 (KP)	Kontrabandu no krime arma proibida	1
Artigu 252, 271 (KP)	Furtu agravadu no krime reseptasaun simples	1
Artigu 257 (KP)	Ameasa	1
Artigu 207 (KP)	Kondusaun sein karta	1
Totál	19	19

2. Totál desizaun ne'ebé JSMP monitoriza : 19

Tipu desizaun	Númeru
Suspensaun ba pena prizaun nia ezekusaun - Artigu 68 Kódigu Penál	10

Omologa dezisténsia keixa	4
Pena multa tuir artigu 67 Kódigu Penál	2
Prizaun nia suspensaun ho devér - Artigu 69	1
Pena admoestasaun	1
Absolve	1
Totál	19

B. Deskripsaun sumáriu julgamentu ba desizaun kazu sira

1. Krime kontrabandu¹

Nú. Prosesu : 0133/17.OESIC
Kompozisaun Tribunál : Singulár
Juis : Dr. João Ribeiro
: Dr. Sribuana da Costa
: Dr. Eusebio Victor Xavier
Prokuradór : Dr. Mateus Nesi
Defeza : Dr. Calisto Tout
: Dr. Inacio Quebo ho Dr. Filipe Landos
Tipu pena : Pena multa

Iha 01 Outubru 2018, Tribunál Distritál Oekusi hatun despaixu notifikasaun leitura akordaun liuhosi ofisial justisa ba krime kontrabandu ne'ebé envolve arguidu Jose Ais no Belarmino do Santos Mauno hasoru Estadu RDTL, iha Suku Nipani, Sub-distritu Pante-Makassar Distritu Oekusi.

Akuzasaun Prokuradór

Prokuradór akuza katak iha 05 Jullu 2017, maisumenus iha tuku 20.00 kalan, arguidu nain rua hatama sasan ilegal liuhosi tasiibun fronteira Sakato. Sasan sira ne'e hanesan prafuju motor nian kaixa ki'ik ida no blok motor nian ida ho valor osan US\$30.00, pentolan plastiku 10 ho valor osan US\$100.00.

Prokuradór akuza arguidu sira kontra artigu 316 Kódigu Penál kona-ba krime kontrabandu ho moldura penál tinan 2 to'o tinan 6 prizaun ka multa.

Produsaun ba prova sira

Iha prosesu julgamentu, arguidu sira konfesa faktus hotu iha akuzasaun, arguidu sira deklarata katak arrepende ona sira nia hahalok. Arguidu sira deklarata katak sira disponivel atu selu fali

¹ Kazu ne'e desizaun notifika deit, tanba hosi dia 1 to'o 5 Outubru 2018, prokuradór atende hela enkontru iha Dili, nune'e desizaun ba kazu sira ne'e tribunál hatun deit despaixu notifikasaun liu hosi ofisial justisa.

kedas taxa ba Diresaun Alfandega maibé hosi Diresaun Alfandega dehan katak depoisde prosesu tribunál hotu mak bele selu taxa. Arguidu sira nu'udar negosiante ki'ik, laiha rendimentu fiksi kada fulan no arguidu sira mesak kaben-nain no iha oan hotu ona.

Prokuradór husu ba Tribunál atu prezinde testemuña hosi Unidade Polisia Fronteira (UPF) nia depoimentu tanba arguidu konfesa faktus hotu iha akuzasaun.

Alegasaun final

Prokuradór konsidera arguidu nain rua provadu komete krime kontrabandu no bazeia ba konfisaun arguidu sira nian, tanba ne'e husu ba tribunál atu aplika pena ne'ebé defenidu ona iha artigu 316 Kódigu Penál (KP).

Enkuantu defeza haktuir katak arguidu sira konfesa faktus hotu iha akuzasaun no arrepende ona sira nia hahalok. Arguidu sira mós hatudu vontade diak atu selu fali taxa ba iha Alfandega maibé hosi parte Alfandega hakarak prosesu hotu iha tribunál mak foin bele selu. Tanba ne'e husu ba tribunál atu aplika pena ne'ebé justu ba arguidu sira.

Desizaun

Depoisde avalia faktu hotu, tribunál prova katak arguidu nain rua komete duni krime tuir faktu sira iha akuzasaun. Bazeia ba faktu provadu sira ne'e, no haree mós ba kapasidade ekonomia hosi kada arguidu, tribunál kondena arguidu Jose Ais ho pena multa US\$67.50 ne'ebé sei selu 0,75 sentavus kada lora durante lora 90. Enkuantu ba arguidu Belarmino do Santos Mauno tribunál kondena ho pena multa US\$45.00 ne'ebé sei selu 0,50 sentavus kada lora durante lora 90. Tribunál mós fiksa pena alternativa durante lora 60 prizaun ba arguidu nain rua, wainhira arguidu sira la kumpri pena multa refere.

2. Krime furtu agravadu no reseptasaun simples ²

Nú. Prosesu	: 0044/16.OEPMK
Kompozisaun Tribunál	: Koletivu
Juis	: Dr. João Ribeiro : Dr. Sribuana da Costa : Dr. Eusebio Victor Xavier
Prokuradór	: Dr. Mateus Nesi
Defeza	: Dr. Marcelino Marques Coro : Dr. Inácio Quebo ho Dr. Filipe Landos
Tipu pena	: Pena prizaun tinan 3 suspende ba tinan 3 ba kada arguidu

Iha 01 Outubru 2018, Tribunál Distritál Oekusi hatun despaixu notifikasaun leitura akordaun liuhosi ofisial justisa ba krime furtu agravadu no reseptasaun simples ne'ebé envolve arguidu Antonio Bubun, Nicodemos dos Santos, Teodoru Caijana, Carlito Tasain Elu, Serafin Cau Elu,

² Kazu ne'e desizaun notifika deit, tanba hosi dia 1 to'o 5 Outubru 2018, prokuradór atende hela enkontru, nune'e desizaun ba kazu sira ne'e tribunál hatun deit despaixu notifikasaun liu hosi ofisial justisa.

Estanislau Abi hasoru lezadu Gil Martins Corbafo, iha Suku Costa, Sub-distritu Pante-makassar Distritu Oekusi.

Akuzasaun Prokuradór

Prokuradór akuza katak iha 16 Setembru 2016, maisumenus iha tuku 10.00 dader, lezadu lori semente sako 100 ba hatun iha estrada ibun Samoro hodi halo bragen (*tembok penahan*). Iha loron ne'e arguidu sira uza semente saku 15 no falta semente sako 85 mak seidak uza, maibé iha loron tuir mai lezadu haree semente hela deit 80.

Iha 23 Setembru 2016, lezadu haree semente hela de'it ona saku 3 no iha loron ne'e kedas lezadu kontinua hatun tan semente saku 140, tanba tuir lezadu nia kalkulasaun ba bragen (*penahan*) ne'e kada kubik 1 tenke han semente saku 2 no total semente ne'ebé lezadu hatun hamutuk semente saku 240. Tuir kalkulasaun ne'ebé iha lezadu lakon semente 62 no semente sira ne'e sura ba osan ho valor US\$385.00. Depoide identifika katak iha semente ne'ebé lakon lezadu husu ba ema sira ne'ebé nia uma besik projeitu refere no haree hetan semente sira ne'e iha arguidu Nicodemos dos Santos nia uma maibé arguidu Nicodemos dos Santos dehan katak semente sira ne'e arguidu nain 5 mak fa'an ba nia.

Prokuradór akuza arguidu nain 5 kontra artigu 252 Kódigu Penál kona-ba krime furtu agravadu ho moldura penál tinan 2 to'o tinan 8 prizaun. Enkuantu arguidu nain 1 seluk prokuradór akuza kontra artigu 271 Kódigu Penál kona-ba krime reseptasaun simples ho moldura penál tinan 2 ka multa.

Antes julgamentu, arguidu Nicodemos dos Santos ho lezadu diak malu ona, nune'e lezadu hakarak dada fali nia keixa hasoru arguidu ba krime reseptasaun. Tanba ne'e prokuradór no defeza husu ba tribunál atu omologa krime kona-ba reseptasaun simples hasoru arguidu. Depoide ida-ne'e, tribunál konklui prosesu ne'e no omologa pedidu dezisténsia keixa hosi lezadu no tribunál kontinua julgamentu ba krime furtu agravadu hasoru arguidu nain lima seluk.

Produsaun ba prova sira

Iha prosesu julgamentu, arguidu nain lima konfesa faktus hotu iha akuzasaun no deklarata katak arrepende ona sira nia hahalok. Arguidu sira mós deklarata katak depoide akontesimentu ne'e, to'o agora lahalo tan krime seluk. Arguidu sira hatene hahalok hanesan ne'e ladiak no kontra lei, arguidu sira servisu nu'udar to'os-nain no laiha rendimentu fiksi kada fulan no promete sei larepete tan hahalok ne'e iha futuru. Arguidu sira mesak kaben-nain no oan-nain hotu.

Enkuantu lezadu deklarata katak arguidu sira la persija fó fila prejuizu ne'ebé iha, maibé husu ba tribunál atu kontinua ba julgamentu, nune'e iha futuru arguidu sira sei larepete tan hahalok hanesan.

Alegasaun finál

Prokuradór konsidera arguidu nain lima provadu komete krime furtu agravadu hasoru lezadu no krime refere barak liu akontese iha Rejiaun Oekusi. Tanba ne'e husu ba Tribunál atu kondena arguidu sira tuir pena ne'ebé hakerek ona iha artigu 252 Kódigu Penál atu nune'e arguidu sira la repete tan hahalok hanesan iha futuru.

Enkuantu Defeza haktuir katak iha produsaun ba prova arguidu sira konfesa faktus hotu iha akuzasaun, arrepende ona sira nia hahalok no promete la repete tan hahalok hanesan iha futuru. Defeza reforsa liutan katak arguidu sira mesak kaben nain no oan-na'in hotu. Arguidu sira nu'udar to'os-nain, laiha rendimentu fiksi kada fulan no kolabora diak ho tribunál. Tanba ne'e husu ba Tribunál atu aplika pena ne'ebé justu ba arguidu.

Desizaun

Depoide avalia faktu hotu, tribunál prova katak arguidu sira provadu komete duni krime tuir faktu sira iha akuzasaun. Bazeia ba prova sira ne'e, tribunál kondena arguidu sira ida-idak ho pena prizaun tinan 3 suspende ba tinan 3.

3. Krime maus tratus ba kónjuje³

Nú. Prosesu	: 0018/16.OEOSL
Kompozisaun Tribunál	: Koletivu
Juis	: Dr. João Ribeiro
	: Dr. Sribuana da Costa
	: Dr. Eusebio Victor Xavier
Prokuradór	: Dr. Mateus Nesi
Defeza	: Dr. Marcelino Marques Coro
	: Dr. Inácio Quebo ho Dr. Filipe Landos
Tipu pena	: Absolve

Iha 04 Outubru 2018, Tribunál Distritál Oekusi hatun despaixu notifikasaun leitura akordaun ba krime maus tratus ba kónjuje ne'ebé envolve arguidu DA hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 04 Juñu 2016, maizumenus tuku 23.00 kalan, arguidu tuku dala rua iha lezada nia kanuruk no rezulta lezada sofre moras no trauma.

Antes ne'e, iha 30 Maiu 2016, maizumenus iha tuku 22.00 kalan, arguidu ho lezada diskute malu kona-ba arguidu deskonfia lezada amante ho mane seluk, nune'e arguidu tuku dala rua iha lezada nia reen-toos, tuku dala ida iha lezada nia hasan karuk. Arguidu kontinua kaer lezada nia liman parte karuk hodi dulas no rezulta lezada sofre moras.

Prokuradór akuza arguidu kontra artigu 154 Kódigu Penál kona-ba krime maus tratus ba kónjuje ho nia moldura penal tinan 2 to'o tinan 6 no konjuga ho artigu 2, 3, 35 no artigu 36 LKVD.

Produsaun ba prova sira

Iha julgamentu, arguidu deklara katak baku duni lezada. Arguidu deklara katak depoide akontesimentu ne'e arguidu ba halo tratamentu iha ospital, sona no hemu aimoruk tanba arguidu

³ Kazu ne'e desizaun notifika deit, tanba hosi dia 1 to'o 5 Outubru 2018, prokuradór atende hela enkontru, nune'e desizaun ba kazu sira ne'e tribunál hatun deit despaixu notifikasaun liu hosi ofisial justisa.

sofre moras mental. Arguidu haktuir tan katak agora nia moras ne'e diak ona no arrepende ona nia hahalok. Arguidu servisu hanesan to'os-na'in laiha rendimentu fixu kada fulan no iha oan nain 4. Arguidu promete ba tribunál katak sei la-komete tan krime hasoru lezada ka ema seluk iha futuru. Arguidu mós deklara katak depoisde akontesimentu ne'e sira moris ketak-ketak, maibé to'o agora arguidu sei hadomi lezada no hakarak atu moris hamutuk fila fali ho lezada.

Enkuantu lezada mantein faktus hotu iha akuzasaun no deklara katak antes akontesimentu ne'e arguidu sofre moras mental no sempre kaer sasan iha uma laran tuda arbiru no wainhira arguidu tuur sempre koalia mes-mesak. Lezada haktuir tan katak depoisde akontesimentu ne'e, lori arguidu ba iha ospital hodi simu aimoruk no sona hafoin arguidu diak uitoan, maibé kuandu liutiha fulan 2 to'o 3 mak lahemu aimoruk arguidu nia moras ne'e mosu fila fali. Lezada reforsa tan katak ho arguidu moris separa maizumenus tinan 3 ona no lezada lakohi atu moris hamutuk ho arguidu.

Testemuña Alexandre Ais nu'udar arguidu nia maun rasik depoimenta katak arguidu antes ne'e sofre duni moras mental, tanba bainhira sira tuur hamutuk ka halo lia ruma arguidu sempre koalia mes-mesak, hakilar no tuda sasan arbiru de'it, maibé agora arguidu diak uitoan ona.

Alegasaun final

Prokuradór haktuir katak arguidu provadu komete krime hasoru lezada. Prokuradór konsidera katak kazu violénsia doméstika sempre akontese, nune'e atu prevene krime ne'e labele akontese tan, husu ba tribunál atu aplika pena tuir artigu 154 KP. Mezmu nune'e prokuradór husu atu haree mós ba sirkunstánsia atenuantes sira hanesan arguidu sofre moras mental.

Enkuantu defeza haktuir katak arguidu konfesa, arrepende ona nia hahalok no promete sei la komete tan krime hasoru lezada iha futuru. Liután defeza haktuir katak antes ne'e arguidu sofre ona moras mental. Tanba ne'e husu ba tribunál atu absolve arguidu hosi prosesu ne'e.

Desizaun

Depoisde avalia faktus ne'ebé prodús durante julgamentu tribunál prova katak antes akontesimentu ne'e arguidu sofre ona moras mental. Tribunál konsidera katak mezmu aguridu deklara katak nia baku lezada, maibé tribunál haree katak arguidu seidauk diak tanba bainhira tribunál husu perguntas sira arguidu sempre hatan arbiru deit. Bazeia ba prova sira ne'e, tribunál konklui prosesu ne'e no absolve arguidu husi prosesu ne'e no entrega fali arguidu ba nia familia atu lori arguidu kada fulan ba iha ospital hodi hetan tratamentu saúde kona-ba arguidu nia moras mental ne'e.

4. Krime kontrabandu

Nú. Prosesu	: 0134/17.OESIC
Kompozisaun Tribunál	: Koletivu
Juis	: Dr. João Ribeiro
	: Dr. Sribuana da Costa
	: Dr. Eusebio Victor Xavier
Prokuradór	: Dr. Mateus Nesi
Defeza	: Dr. Marcelino Marques Coro
	: Dr. Inácio Quebo ho Dr. Filipe Landos

Tipu Pena : Pena prizaun tinan 2 suspende ba tinan 2 maibé izensaun ba pena

Iha 05 Outubru 2018, Tribunál Distritál Oekusi hatun despaixu notifikasaun leitura akordaun krime kontrabandu ne'ebé envolve arguida Maria Oqui hasoru Estadu RDTL, iha Suku Bobometo, Sub-distritu Oesilo, Distritu Oekusi.

Akuzasaun Prokuradór

Prokuradór akuza katak iha 06 Julu 2017, maizumenus iha tuku 02.00 madrugada, arguida hatama kombustivel ilegalmente husi Saben-Indonezia, tama mai territoria Timor-Leste. Kombustivel hirak ne'e mak hanesan gasolina litrus 670 ho valor osan US\$304.00, gazoel litrus 460 ho valor osan US\$168.00. Total kombustivel ne'ebé arguida lori hosi Indonezia tama mai Timor-Leste hamutuk litrus 1130 ho valor osan US\$472.00.

Prokuradór akuza arguida kontra artigu 316 Kódigu Penál kona-ba krime kontrabandu ho moldura penál tinan 2 to'o tinan 6 prizaun ka multa.

Produsaun ba prova sira

Iha julgamentu, arguida konfesa faktus hotu iha akuzasaun no deklara katak arrepende ona nia hahalok. Arguida selu ona taxa ba iha prokuradór ho montante US\$544.00 no arguida servisu nu'udar negosiante ki'ik ho rendimentu ne'ebé la fíksu kada fulan no promete sei larepete tan hahalok ne'e iha futuru. Arguida kaben nain no iha oan nain 4.

Prokuradór husu ba Tribunál atu prezindi testemuña hosi Unidade Polisia Fronteira (UPF) nia depoimentu, tanba arguida konfesa faktus hotu iha akuzasaun.

Alegasaun finál

Prokuradór konsidera arguida provadu komete krime kontrabandu no krime kontrabandu barak liu akontese iha Rejiaun Oekusi no hamosu prejuizu ba Estadu RDTL. Tanba ne'e husu ba Tribunál atu kondena arguida tuir pena ne'ebé hakerek ona iha artigu 316 Kódigu Penál atu prevene arguidu la repete tan hahalok hanesan iha futuru.

Enkuantu Defeza haktuir katak arguida rasik konfesa faktus hotu iha akuzasaun, arrepende ona nia hahalok no promete la repete tan hahalok hanesan iha futuru. Defeza reforsa liután katak antes julgamentu arguida hatudu nia vontade diak no selu fali taxa ba iha konta prokuradór nian. Arguida nu'udar negosiante ki'ik no laiha rendimentu fíksu kada fulan no arguida hatudu kolaborasaun diak ho tribunál. Tanba ne'e husu ba Tribunál atu aplika pena ne'ebé justu ba arguida.

Desizaun

Depoizide avalia faktus provadu sira ne'ebé prodús durante julgamentu, bazeia artigu 28 KP kona-ba arrendimentu posteriór no artigu 318 KP kona-ba izensaun ba pena, tribunál konklui prosesu ne'e no kondena arguida ho pena prizaun tinan 2 suspende ba tinan 2 maibé tribunál deside atu halo izensaun ba pena, tanba arguida selu ona taxa ba estadu.

5. Krime ofensa ba integridade fízika simples

Nú. Prosesu : 0010/18.OEBCN
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Calisto Tout
Tipu pena : Omologa pedidu dezisténsia keixa

Iha 05 Outubru 2018, Tribunál Distritál Oekusi prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Paulo Tamele hasoru lezadu Domingos Cab, iha Suku Lelaufe Sub-distritu Nitibe, Distritu Oekusi.

Akuzasaun Prokuradór

Prokuradór akuza katak iha 20 Feveiruru 2018, maizumenus tuku 09.00 dader, arguidu ho kondisaun lanu tuku dala ida iha lezadu nia hasan karuk no tuku dala ida iha lezadu nia kanuruk no rezulta lezadu sofre moras. Kazu ne'e akontese sein motivu ne'ebé klaru tanba iha akontesimentu ne'e arguidu ho kondisaun lanu.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penál too tinan 3 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, lezadu hakarak dame malu de'it no dada fali nia-keixa maibé ho kondisaun katak arguidu tenke fó indemnizasaun sivil ho montante osan US\$50.00 ba lezadu. Arguidu konkorda no sei fó indemnizasaun sivil ba lezadu tuir pedidu lezadu nian. Arguidu mós deklara katak arrepende ona nia hahalok no promete katak sei la repete tan hahalok hanesan iha futuru, nune'e lezadu husu ba tribunál atu dezisté ninia-keixa hasoru arguidu.

Alegasaun final

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba akordu dame hosi parte rua no pedidu dezisténsia hosi lezadu, tribunál konklui prosesu ne'e no omologa akordu dame entre parte sira no husu ba arguidu atu kumpri ninia devér hodi fó indemnizasaun sivil ba lezadu ho montante osan US\$50.00.

6. Krime kontrabandu

Nú. Prosesu : 0009/17.OESIC
Kompozisaun Tribunál : Singulár
Juis : Dr. João Ribeiro
: Dr. Sribuana da Costa
: Dr. Eusebio Victor Xavier

Prokuradór : Dr. Mateus Nesi
Defeza : Dr. Calisto Tout
 : Dr. Inácio Quebo ho Dr. Filipe Landos
Tipu pena : Pena prizaun tinan 2 no suspende ba tinan 2

Iha 08 Outubru 2018, Tribunál Distritál Oekusi prezide leitura akordaun ba krime kontrabandu ne'ebé envolve arguidu Francisco Atolan hasoru Estadu RDTL, iha Suku Bobometo, Sub-distritu Oesilo Distritu Oekusi.

Akuzasaun Prokuradór

Prokuradór akuza katak iha 10 Janeiru 2017, maizumenus iha tuku 03.20 madrugada, arguidu hatama sasan liuhosi dalan ilegal sasan sira ne'e hanesan gazolina litru 40, tahu balde 3, fehuk rounpa sako 2, lakeru mutin karon 2, tempe karon 2, batar nurak sako 3 no modo repolho sako 2. Arguidu nia hahalok ne'e hamosu prezuiju ba Estadu RDTL tanba laselu taxa ba iha diresaun Alfandega.

Prokuradór akuza arguidu kontra artigu 316 Kódigu Penál kona-ba krime kontrabandu ho moldura penál tinan 2 to'o tinan 6 prizaun ka multa.

Produsaun ba prova

Iha julgamentu, arguidu konfesa faktus hotu iha akuzasaun no deklarata katak arrepende ona nia hahalok. Arguidu mós deklarata katak depoisde akontesimentu ne'e, hakarak selu fali taxa ba Diresaun Alfandega maibé Diresaun Alfandega hakarak prosesu hotu iha Tribunál mak foin bele selu taxa. Arguidu servisu nu'udar to'os-na'in, laiha rendimentu fíksu kada fulan no promete sei larepete tan hahalok hanesan iha futuru. Arguidu kabem na'in, iha oan nain 4 no foin primeiravés mai hatan iha tribunál.

Prokuradór husu ba tribunál atu prezinde testemuña hosi Unidade Polísia Fronteira (UPF) nia depoimentu, tanba arguidu konfesa faktus hotu iha akuzasaun.

Alegasaun final

Prokuradór konsidera arguidu provadu komete krime kontrabandu hasoru Estadu no krime ne'e barak liu akontese iha Regiaun Oekusi no hamosu prejuizu ba Estadu RDTL. Tanba ne'e husu ba Tribunál atu kondena arguidu tuir pena ne'ebé hakerek ona iha artigu 316 Kódigu Penál atu nune'e arguidu la repete tan hahalok hanesan iha futuru.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok no promete la repete tan hahalok hanesan iha futuru. Defeza reforsa liután katak antes julgamentu arguidu hatudu nia vontade atu selu fali taxa ba iha diresaun alfandega, maibé Diresaun Alfandega hakarak prosesu hotu iha tribunál mak foin bele selu. Arguidu orjinalmente nu'udar to'os-nain maibé iha tempu hanesan halo mós negosiu ki'ik no laiha rendimentu fíksu kada fulan no arguidu iha kolaborasaun diak ho tribunál. Tanba ne'e husu ba tribunál aplika pena ne'ebé adekuadu ba arguidu.

Desizaun

Depoisde avalia faktus hotu, tribunál prova katak arguidu komete duni krime tuir faktus sira iha

akuzasaun. Bazeia ba prova sira ne'e, tribunál konklui prosesu ne'e kondena arguidu ho pena prizaun tinan 2 no suspende ba tinan 2.

7. Krime furtu agravadu

Nú. Prosesu : 0135/17.OESIC
Kompozisaun Tribunál : Koletivu
Juis : Dr. João Ribeiro
: Dr. Sribuana da Costa
: Dr. Eusebio Victor Xavier
Prokuradór : Dr. Mateus Nesi
Defeza : Dr. Calisto Tout
Tipu pena : Pena prizaun tinan 3 no suspende ba tinan 3

Iha 08 Outubru 2018, Tribunál Distritál Oekusi prezide julgamentu leitura akordaun ba krime furtu agravadu ne'ebé envolve arguidu Carlos Diego Mesquita hasoru Diresaun Edukasaun Rejionál-Oekuse, iha Suku Costa, Sub-distritu Pante-makassar Distritu Oekusi.

Akuzasaun Prokuradór

Prokuradór akuza katak iha 06 Jullu 2017, maizumenus iha tuku 22.00 kalan, arguidu hanesan seguransa sivil iha Edifisiu Diresaun Edukasaun Rejionál Oekusi, iha kalan ne'e, arguidu tama ba iha edifisiu laran hodi foti sasan hanesan, toner HP laserjet 53 A hamutuk 3 ho valor osan US\$240.00 no tinta ki'ik pixma marka canon 810 falun 20 ho valor osan US\$560.00. Total pejuizu ne'ebé mak iha ho valor osan US\$800.00.

Prokuradór akuza arguidu kontra artigu 252 Kódigu Penál kona-ba krime furtu agravadu ho moldura penál tinan 2 to'o tinan 8 prizaun.

Produsaun ba prova

Iha julgamentu, arguidu konfesa faktus hotu iha akuzasaun no deklarata katak arrepende ona nia hahalok no depoisde akontesimentu ne'e to'o agora arguidu la komete ona krime seluk. Arguidu mós deklarata katak antes akontesimentu ne'e arguidu servisu hanesan seguransa sivil, maibé depoisde akontesimentu ne'e Diresaun Edukasaun Rejionál Oekusi hapara ona arguidu ninia kontratu, nune'e agora dadaun arguidu servisu nu'udar to'os-na'in no laiha rendimentu fiksi kada fulan no promete sei larepete tan hahalok hanesan iha futuru.

Prokuradór husu ba tribunál atu prezinde testemuña hosi Diresaun Edukasaun Rejionál Oekusi nia depoimentu, tanba arguidu konfesa faktus hotu iha akuzasaun.

Alegasaun finál

Prokuradór konsidera arguidu provadu komete krime furtu agravadu hasoru Estadu RDTL, tanba ne'e husu ba tribunál atu kondena arguidu tuir pena ne'ebé hakerek ona iha artigu 252 Kódigu Penál atu nune'e arguidu la repete tan hahalok hanesan iha futuru.

Enkuantu defeza haktuir katak arguidu konfesa faktus hotu iha akuzasaun, arrepende ona nia hahalok no promete la repete tan hahalok hanesan iha futuru. Defeza reforsa liután katak arguidu hanesan kaben nain no iha oan nain 1. Arguidu nu'udar to'os-na'in, laiha rendimentu fiksi kada

fulan no kolabora ho tribunál. Tanba ne'e husu ba Tribunál atu aplika pena ne'ebé adekuadu ba arguidu.

Desizaun

Depoizde avalia faktu sira hotu, tribunál prova katak arguidu provadu komete duni krime tuir faktu sira iha akuzasaun prokuradór nian. Bazeia ba faktus provadu sira ne'e, tribunál konklui prosesu ne'e no kondena arguidu ho pena prizaun tinan 3 no suspende ba tinan 3.

8. Krime ameasa

Nú. Prosesu : 0030/18.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Omologa pedidu dezisténsia keixa

Iha 08 Outubru 2018, Tribunál Distritál Oekusi prezide julgamentu tentativa konsiliaun ba krime ameasa ne'ebé envolve arguidu DFN hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 20 Fevereiru 2018, maisumenus iha tuku 19.00 kalan, arguidu ameasa lezada katak "*o mangame, ha'u haruka ema Nianapu oho mate ó*", nune'e lezada tauk no trauma hodi lori sira nia oan nain tolu halai sai husi sira nia uma ba hela hamutuk ho lezada nia inan-aman sira. Kazu ne'e akontese sein motivu ne'ebé klaru.

Prokuradór akuza arguidu kontra artigu 157 Kódigu Penál kona-ba krime ameasa ho moldura penál too tinan 2 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu no lezada.

Iha prosesu konsiliaun ne'e, arguidu deklara katak arrepende ona nia hahalok no diak malu ona ho lezada no hela hamutuk fali ona iha uma ida. Lezada konkorda ho pedidu ne'e no husu ba tribunál atu dezisté ninia-keixa hasoru arguidu.

Alegasaun final

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba akordu hosi parte rua no pedidu dezisténsia hosi lezada, tribunál konklui prosesu ne'e no omologa akordu dame entre parte sira no husu ba arguidu atu labele repete tan hahalok hanesan iha futuro.

9. Krime ofensa ba integridade fízika simples ho natureza violénsia doméstika

Nú. Prosesu : 0035/18.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun tinan 2 no suspende ba tinan 2

Iha 08 Outubru 2018, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu TF hasoru nia oan nain 3 hanesan, CF (tinan 15), FF (13) no JF (tinan 9), iha Suku Costa, Sub-distritu Pante-makassar, Distritu Oekusi.

Akuzasaun Prokuradór

Prokuradór akuza katak iha 01 Marsu 2018, maisumenus tuku 18.00 lokraik, arguidu basa dala rua iha lezada CF nia hasan parte loos, lori ai-sanak baku dala ida iha lezada FF nia kotuk laran no lori ai-sar futun ida baku dala ida iha lezadu JF nia kotuk laran. Aktu ne'e rezulta lezada/u sira sofre moras. Kazu ne'e akontese wainhira lezada/u sira hakarak hela hamutuk ho sira nia inan, maibé arguidu lakohi, tanba arguidu ho nia feen (lezada/u sira nia inan) fahe-malu ona. Kazu ne'e aneksa mós ho relatóriu médiku husi PRADET no fotografia husi Polisia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) no artigu 36 LKVD.

Produsaun ba prova sira

Iha julgamentu, arguidu konfesa faktus hotu iha akuzasaun no deklarara katak arrepende ona nia hahalok. Arguidu hatene baku labarik hanesan ne'e ladiak no kontra lei Timor no arguidu foin primeiravés mai hatan iha tribunál. Arguidu deklarara mós katak servisu hanesan to'os-na'in laiha rendimentu fixu kada fulan. Depoisode akontesimentu ne'e diak malu kedas ho lezada/u sira no agora moris hamutuk fali ona hanesan familia ida.

Prokuradór husu ba tribunál atu prezinde lezada/u sira nia deklarasaun, tanba arguidu konfesa faktus hotu iha akuzasaun.

Alegasaun finál

Prokuradór konsidera arguidu provadu komete krime hasoru nia oan nain 3 bazeia ba konfisaun arguidu nian. Tanba ne'e husu ba tribunál atu kondena arguidu tuir pena ne'ebé hakerek ona iha artigu 145 KP.

Enkuantu defeza husu ba tribunál atu kondena arguidu ho pena ne'ebé adekua. Defeza mós ba tribunál atu konsidera sirkunstánsia atenuantes sira hanesan, arguidu konfesa, arrepende ona nia hahalok, foin primeiravés mai hatan iha tribunál, diak malu ona no hela hamutuk fali ona ho lezada/lezadu sira iha uma ida no promete sei la komete tan krime hanesan hasoru nia membru familia sira ka ema seluk.

Desizaun

Depoizde avalia faktu sira hotu, tribunál prova katak arguidu komete duni krime tuir faktu sira iha akuzasaun prokuradór nian. Bazeia ba faktu provadu sira ne'e, tribunál konklui prosesu ne'e no kondena arguidu ho pena prizaun tinan 2 no suspende ba tinan 2.

10. Krime ofensa ba integridade fízika simples

Nú. Prosesu : 0015/18.OEPMK
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Omologa pedidu dezisténsia keixa

Iha 08 Outubru 2018, Tribunál Distritál Oekusi prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Teodorus Coa hasoru lezadu Guilermos Falo, iha Suku Nipani Sub-distritu Pante-makassar, Distritu Oekusi.

Akuzasaun Prokuradór

Prokuradór akuza katak iha 26 Marsu 2018, maisumenus tuku 23.00 kalan, arguidu ho kondisaun lanu tuku dala ida iha lezadu nia ibun no rezulta lezadu sofre moras, kanek no ran. Aktu ne'e akontese sein motivu ne'ebé klaru. Kazu ne'e aneksa mós ho relatóriu médiku husi Ospital Referal Oekusi no fotografia husi Polisia-VPU

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penál too tinan 3 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, lezadu hakarak dame malu de'it no dada fali nia-keixa maibé ho kondisaun katak arguidu tenke fó indemnizasaun sivil ho montante osan US\$40.00 ba lezadu. Arguidu konkorda no sei fó indemnizasaun sivil ba lezadu tuir pedidu lezadu nian. Arguidu mós deklara katak arrepende ona nia hahalok no promete sei la repete tan hahalok hanesan iha futuru, nune'e lezadu husu ba tribunál atu dezisté ninia-keixa hasoru arguidu.

Alegasaun final

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba akordu hosi parte rua no pedidu dezisténsia hosi lezadu, tribunál konklui prosesu ne'e no omologa akordu dame entre parte sira no husu ba arguidu atu kumpri ninia devér hodi fó indemnizasaun sivil ba lezadu ho montante osan US\$40.00.

11. Krime kontrabandu no arma proibida

Nú. Prosesu : 0152/16.OESIC
Kompozisaun Tribunál : Koletivu
Juis : Dr. João Ribeiro
: Dr. Sribuana da Costa
: Dr. Eusebio Victor Xavier
Prokuradór : Dr. Mateus Nesi
Defeza : Dr. Calisto Tout
: Dr. Inácio Quebo ho Dr. Filipe Landos
Tipu pena : Pena prizaun tinan 2 no suspende ba tinan 2

Iha 09 Outubru 2018, Tribunál Distritál Oekusi prezide julgamentu leitura akordaun ba krime kontrabandu no arma proibida ne'ebé envolve arguidu Marcos Bubun hasoru Estadu RDTL, iha Suku Abani, Sub-distritu Passabe, Distritu Oekusi.

Akuzasaun Prokuradór

Prokuradór akuza katak iha 20 Agostu 2016, maizumenus tuku 15.00 lokraik, arguidu liuhosi fronteira Passabe atu ba Haumeni-ana Indonezia. Wainhira arguidu tama fali mai territoriu Timor-Leste liuhosi fronteira Passabe, arguidu lori subar kilat manu nian lolon 2 ho marka Sharap Innova Tiger 1 no Sharap Steven 4,5 mm 1 ho objetivu atu fa'an iha Oekusi.

Prokuradór akuza arguidu kontra artigu 316 Kódigu Penál kona-ba krime kontrabandu ho moldura penál tinan 2 to'o tinan 6 prizaun ka multa no artigu 211 Kódigu Penál kona-ba krime arma proibida ho moldura penál tinan 2 to'o tinan 6 prizaun.

Produsaun ba prova sira

Iha julgamentu, arguidu konfesa faktus hotu iha akuzasaun no deklarata katak arrepende ona nia hahalok. Arguidu hatene katak hahalok hanesan ne'e ladiak no kontra lei Timor. Arguidu promete sei larepete tan hahalok ne'e iha futuru. Arguidu servisu nu'udar to'os-na'in laiha rendimentu fíksu kada fulan no arguidu hanesan kaben nain no iha oan nain 5.

Prokuradór husu ba Tribunál atu prezinde testemuña hosi Unidade Polisia Fronteira (UPF) nia depoimentu, tanba arguidu konfesa faktus hotu iha akuzasaun.

Alegasaun finál

Prokuradór konsidera arguidu provadu komete krime kontrabandu no arma proibida hasoru estadu tanba iha produsaun ba prova arguidu konfesa faktus hotu. Prokuradór haktuir liután katak arma proibida hanesan kilat, kuandu la uza tuir nia funsaun no bele fó risku ba ema seluk nia vida. Tanba ne'e husu ba Tribunál atu kondena arguidu tuir pena ne'ebé hakerek ona iha artigu 316 Kódigu Penál no artigu 211 Kódigu Penál.

Enkuantu Defeza haktuir katak iha produsaun ba prova arguidu rasik konfesa faktus hotu iha akuzasaun, arrepende ona nia hahalok no promete la repetan tan hahalok hanesan iha futuru. Defeza reforsa liutan katak arguidu hola kilat ne'e ho objetivu atu fa'an no arguidu lori kilat hirak ne'e tuir duni fronteira Passabe ka dalan legal. Arguidu hatudu nia vontade atu kolabora

diak ho tribunál no arguidu nu'udar to'os-na'in, laiha rendimentu fiksi kada fulan. Tanba ne'e husu ba tribunál atu aplika pena ne'ebé kmaan ba arguidu.

Desizaun

Depoide avalia faktu hotu, tribunál prova katak arguidu nia hahalok ne'e latama iha arma proibida maibé arguidu nia hahalok ne'e tama ka prova iha krime kontrabandu tuir faktu sira iha akuzasaun. Bazeia ba prova sira ne'e, tribunál kondena arguidu ho pena prizaun tinan 2 suspende ba tinan 2. Kona-ba sasan hanesan kilat manu rua ne'e, tribunál decide atu monu ba estadu hodi halo destroisaun.

12. Krime aktu seksuál ho adolxente, pornografia infantíl, ezibisionizmu seksuál, ofensa ba integridade fízika simples no krime ameasa

Nú. Prosesu : 0156/17.OESIC
Kompozisaun Tribunál : Koletivu
Juis : Dr. João Ribeiro
: Dr. Sribuana da Costa
: Dr. Eusebio Victor Xavier
Prokuradór : Dr. Mateus Nesi
Defeza : Dr. Calisto Tout
Tipu pena : Pena prizaun tinan 2 no suspende ba tinan 3 ho dever adisionál

Iha 09 Outubru 2018, Tribunál Distritál Oekusi prezide julgamentu leitura akordaun ba krime koasaun seksuál, pornografia infantíl, ezibisionizmu seksuál, ofensa ba integridade fízika simples no krime ameasa ne'ebé envolve arguidu EMP hasoru lezada LMM, iha Suku Costa, Sub-distritu Pante-makassar Distritu Oekusi.

Akuzasaun Prokuradór

Prokurador akuza katak maizumenus iha Maiu 2017, arguidu hatudu video ne'ebé mane ho fetu halo hela relasaun seksuál, mesmu lezada lakohi, maibé arguidu obriga lezada atu haree video ne'e.

Iha 27 Marsu 2017, arguidu nia oan ki'ik tanis, hafoin arguidu nervoju lori mangeira baku dala ida iha lezada kanuruk no lori ai-sar futun ida baku dala ida iha lezada nia ain parte karuk.

Iha tinan 2016, arguidu hatudu foto ba lezada (mane ho fetu molik) iha arguidu nia telefone no lezada hateten ba arguidu katak nia lakohi haree, maibé arguidu dehan ba lezada katak, "*ó hare de'it no buat ne'e diak*".

Liutiha semana ida iha tinan 2016, arguidu kontinua hatudu foto pornografia ba lezada (video fetu ho mane halo relasaun seksuál), lezada hatete ba arguidu katak nia lakohi haree buat a'at ne'e. Maibé arguidu ko'alia ba lezada katak buat ne'e diak no kuandu ita nain rua halo hanesan ne'e, *ita rua senti gostu loos*.

Maizumenus iha Marsu 2015 kalan, arguidu haruka lezada ho nia alin fetu toba iha arguidu sira nia kuartu no arguidu toba iha varanda. Bainhira kalan bo'ot, arguidu tama ba kuartu laran, arguidu hakoak metin lezada hodi rei lezada nia hasan, kaer lezada nia susun no hateten ba

lezada katak toba nonok. Aktu ne'e rezulta lezada tauk, nakdedar no labele toba to'o rai naroman, lezada halai fila ba nia avo nia uma.

Antes lezada fila ba nia avo nia uma lezada kolia ba arguidu katak; *“apa ki'ik, nusa mak horikalan latoba iha liur, ba toba fali ho ami, orsida avo sira mai ha'u fó hatene sira.”* Arguidu hateten ba lezada katak labele fó hatene avo sira, inklui ó-nia inan-aman no ó-nia inan ki'ik (arguidu nia feen), selae ha'u baku ó. Aktu ne'e akontese kuandu lezada nia avo sira hamutuk ho nia inan ki'ik ba halo hela lia.

Prokuradór akuza arguidu kontra artigu 171, 176, 181, 145 no 157 Kódigu Penál kona-ba krime koasaun seksuál, pornografia infantíl, ezibisionizmu seksuál, ofensa ba integridade fízika simples no krime ameasa.

Bazeia ba artigu 262 KPP kona-ba tentativa ba konsiliaun ba krime ezibisionizmu seksuál, ofensa ba integridade fízika simples no krime ameasa, nune'e antes tama ba julgamentu produsaun ba prova, juis husu atu halo tentativa konsiliaun ba arguidu no lezada.

Iha prosesu konsiliaun ne'e, lezada hakarak dame malu de'it no dada fali nia-keixa maibé ho kondisaun katak arguidu tenke fó indemnizasaun sivil ho montante osan US\$250.00 ba lezada. Arguidu konkorda no sei fó indemnizasaun sivil ba lezada hanesan saida mak lezada propoin ona. Arguidu mós deklara katak arrepende ona nia hahalok no promete katak sei la repete tan hahalok hanesan iha futuru, nune'e lezada husu ba tribunál atu deziste ninia-keixa hasoru arguidu. Tanba ne'e, tribunál konklui no omologa pedidu dezistensia keixa ba krime ezibisionizmu seksuál, ofensa ba integridade fízika simples no krime ameasa hasoru arguidu no kontinua prosesu julgamentu ba krime koasaun seksuál no pornografia infantíl hasoru arguidu.

Produsaun ba prova sira

Iha prosesu julgamentu, arguidu konfesa faktus hotu iha akuzasaun no arguidu deklara katak arrepende ona nia hahalok. Arguidu servisu iha kompañia SDSB RUDAL ho vensimentu kada fulan US\$115.00 no promete sei larepete tan hahalok ne'e iha futuru. Arguidu kaben-nain no iha oan nain 2 no foin primeiravés mai hatan iha tribunál.

Prokuradór husu ba tribunál atu prezinde lezada no testemuña sira nia depoimentu, tanba arguidu konfesa faktus hotu iha akuzasaun.

Depoizde produsaun ba prova, tribunál verifika no bazeia ba artigu 273 KPP halo alterasaun la-substansiál kona-bá faktu iha akuzasaun. Tanba ne'e, tribunál halo alterasaun ba krime koasaun seksuál ne'ebé previstu no punidu iha artigu 171 KP ba fali krime aktu seksuál ho adolexente ne'ebé previstu no punidu iha artigu 178 KP tanba kuandu tribunál verifika faktu ne'e akontese iha tinan 2015 no iha tempu ne'eba lezada foin halo tinan 14.

Alegasaun finál

Prokuradór konsidera arguidu provadu komete krime aktu seksuál ho adolexente no pornografia infantíl hasoru lezada. Prokuradór reforsa tan katak tuir lolos arguidu mak protégé lezada tanba lezada sei idade menór no lezada mak arguidu nia subriña. Tanba ne'e husu ba tribunál atu

kondena arguidu tuir pena ne'ebé hakerek ona iha artigu 178 Kòdigu Penál no 176 Kódigu Penál atu nune'e arguidu la repete tan hahalok hanesan iha futuru hasoru nia membru familia sira.

Enkuantu defeza haktuir katak arguidu konfesa faktus hotu iha akuzasaun, arrepende ona nia hahalok no promete la repete tan hahalok hanesan iha futuru. Arguidu hanesan kaben-nain no iha oan nain 2, servisu iha kompañia SDSB RUDAL ho vensimentu kada fulan US\$115.00 no foin primeiravés mai hatan iha tribunál. Arguidu iha kolaborasaun diak ho tribunál tanba iha produsaun ba prova arguidu rasik konfesa no aseita atu fó indemnizasaun sivil ba lezada ho valor osan US\$250.00. Tanba ne'e husu ba tribunál atu aplika pena ne'ebé adekuadu ba arguidu.

Desizaun

Depoide avalia faktus sira ne'ebé prodús durante julgamentu, tribunál konsidera katak arguidu nia hahalok ne'e la priense krime pornografia infantil, maibé arguidu nia hahalok ne'e priense krime aktu seksuál ho adolexente, faktus hotu provadu tuir faktu sira iha akuzasaun tanba arguidu konfesa, arguidu hatudu video seksuál ba labarik kontra lezada nia hakarak, seidak dame malu ho lezada, arguidu iha intensaun maka'as atu komete krime ne'e.

Tribunál mós konsidera katak haree ba sirkunstánsia atenuántes no agravantes hirak ne'e hotu, konklui prosesu ne'e hodi absolve arguidu husi krime pornografia infantil no kondena arguidu komete duni krime aktu seksuál ho adolexente no kondena arguidu ho pena prizaun tinan 2 suspende ba tinan 3 no selu kusta judisiál US\$50.00. Tribunál mós aplika dever adisionál atu arguidu husu deskulpa ba lezada iha autoridade lokal nia oin iha tempu loron 20 nia laran, depoide desizaun tranzitu iha julgadu no lori akta husi suku nian mai tribunál atu junta hamutuk iha prosesu.

13. Krime ofensa ba integridade fízika simples ho natureza violénsia doméstika

Nú. Prosesu : 0005/18.OEBCN
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun fulan 6 no suspende ba tinan 1

Iha 10 Outubru 2018, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JAE hasoru nia feen, iha Distritu Oekusi

Akuzasaun Prokuradór

Prokuradór akuza katak iha 23 Fevereiru 2018, maizumenus tuku 08.00 dader, arguidu basa dala ida iha lezada nia hasan parte karuk no kauza lezada monu ba rai no sofre moras. Kazu ne'e anexa mós ho relatóriu mediku husi Centru Saude Baocnana no fotografia husi Polísia-VPU.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penál to'o tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Iha julgamentu, arguidu konfesa faktus hotu iha akuzasaun, arguidu deklara katak arrepende ona nia hahalok. Arguidu servisu hanesan to'os-na'in no laiha rendimentu fixu kada fulan, iha oan nain 3, no arguidu foin primeiravés mai hatan iha tribunál no diak malu ona ho lezada. Tribunál presindi lezada nia deklarasaun, tanba arguidu konfesa faktus hotu iha akuzasaun.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no tuir loloos arguidu mak proteze lezada, maibé pela kontrariu arguidu mak komete fali krime hasoru lezada. Tanba ne'e husu ba tribunál atu kondena arguidu tuir artigu 145 Kódigu Penál.

Iha parte seluk, defeza husu ba tribunál atu aplika pena ne'ebé adekua ba arguidu ho konsiderasaun sira katak, arguidu konfesa, arrepende ona nia hahalok, iha oan nain 3, foin primeiravés mai hatan iha tribunál, diak malu ona ho lezada no hela hamutuk iha uma ida.

Desizaun

Depoiz de avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba prova sira ne'e hotu, tribunál kondena arguidu ho pena prizaun fulan 6 no suspende ba tinan 1.

14. Krime ofensa ba integridade fízika simples ho natureza violénsia doméstika

Nú. Prosesu : 0042/17.OEBCN
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun tinan 1 no suspende ba tinan 1

Iha 10 Outubru 2018, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu LQ hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 01 Setembru 2017, maisumenus tuku 11.00 dader, arguidu ho lezada diskute malu, wainhira arguidu halimar telefone no lezada dehan ba arguidu katak "*labele halimar telefone deit, haree halo servisu,*" nune'e arguidu lori kadeira masa ida hodi baku dala ida iha lezada nia ulun. Aktu ne'e rezulta lezada sofre moras iha ulun. Kazu ne'e anexa mós ho relatóriu médiku husi Centru Saude Baocnana no fotografia husi Polisia-VPU.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penál to'o tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Iha julgamentu, arguidu konfesa faktus hotu iha akuzasaun, arguidu mós deklarara katak arrepende ona nia hahalok. Arguidu servisu hanesan to'os-na'in no laiha rendimentu fixu kada fulan. Arguidu iha oan nain 4, no foin primeiravés mai hatan iha tribunál. Arguidu reforsa tan katak dame malu ona ho lezada no moris hamutuk fali ona iha uma ida hanesan feen-laen.

Prokuradór husu ba tribunál atu prezinde lezada nia deklarasaun, tanba arguidu konfesa faktus hotu iha akuzasaun.

Alegasaun final

Prokuradór konsidera arguidu provadu komete krime hasoru lezada bazeia ba konfisaun arguidu nian. Prokuradór reforsa tan katak atu rezolve problema la'os tenke ho violénsia. Tanba ne'e husu ba tribunál atu kondena arguidu tuir artigu 145 Kódigu Penál.

Iha parte seluk defeza husu ba tribunál atu aplika pena ne'ebé kmaan ba arguidu, tanba arguidu konfesa faktus hotu iha akuzasaun, arrepende ona nia hahalok. Aleinde ne'e, iha oan nain 4, foin primeiravés mai hatan iha tribunál, diak malu ona ho lezada no agora dadaun hela hamutuk iha uma ida hanesan feen ho laen.

Desizaun

Depoizde avalia faktu sira hotu, tribunál prova katak arguidu provadu komete krime hasoru lezada. Bazeia ba faktus provadu sira ne'e, tribunál konklui prosesu ne'e no kondena arguidu ho pena prizaun tinan 1 suspende ba tinan 1.

15. Krime ofensa ba integridade fízika simples ho natureza violénsia doméstika

Nú. Prosesu	: 0052/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Pena prizaun tinan 1 no suspende ba tinan 1

Iha 10 Outubru 2018, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AP hasoru nia alin mane rasik, iha Distritu Oekusi.

Akuzasaun Prokuradór

Prokuradór akuza katak iha 08 Abril 2018, maizumenus tuku 13.30 lokraik, arguidu lori remot TV nian tuda lezadu no kona iha lezadu nia hirus-matan. Arguidu kontinua lori kadeira masa baku dala ida iha lezadu nia kabaas. Agressaun hirak-ne'e rezulta lezadu sofre moras. Aktu ne'e akontese wainhira lezadu halo a'at remot TV nian. Kazu ne'e anexa mós ho relatóriu médiku husi Ospital Referral Oekusi no fotografia husi Polísia-VPU.

Prokuradór akuza arguidu kontra artigu 145 Kódigu Penál kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Durante julgamentu, arguidu konfesa faktus hotu iha akuzasaun, arguidu deklara katak arrepende ona nia hahalok. Arguidu servisu hanesan to'os-na'in, laiha rendimentu fixu kada fulan no iha oan nain ida. Arguidu promete ba tribunál katak sei la-komete tan krime hasoru lezadu ka ema seluk iha futuru no depoisde akontesimentu ne'e diak malu kedas ho lezadu no agora dadaun nafatin moris hamutuk iha uma 1 hanesan maun-alin.

Prokuradór husu ba tribunál atu prezinde lezadu nia deklarasaun, tanba iha produsaun ba prova arguidu konfesa faktus hotu iha akuzaaun.

Alegasaun final

Prokuradór haktuir katak arguidu provadu komete krime hasoru lezadu no kazu violénsia doméstika barak liu akontese iha Rejiaun Oekusi kompara ho distritu/munisípiu sira seluk. Tanba ne'e husu ba tribunál atu aplika pena tuir artigu 145 KP.

Enkuantu defeza haktuir katak arguidu deklara faktus hotu ne'ebé akuza ba arguidu, arrepende ona nia hahalok no promete sei la komete tan krime hasoru lezadu iha futuru no arguidu iha oan nain ida. Defeza haktuir tan katak arguidu laiha rendimentu fixu kada fulan no foin primeiravés mai hatan iha tribunál. Tanba ne'e husu ba tribunál aplika pena ne'ebé kmaan ba arguidu.

Desizaun

Tribunál prova katak arguidu provadu komete krime hasoru lezadu. Bazeia ba faktu provadu hirak ne'e no sirkunstánsia atenuante sira hotu hanesan arguidu konfesa, arrepende ona nia hahalok, foin primeiravés mai hatan iha tribunál no diak malu ona ho lezada, tribunál konklui prosesu ne'e no kondena arguidu ho pena prizaun tinan 1 no suspende ba tinan 1.

16. Krime ofensa ba integridade física simples ho natureza violénsia doméstika

Nú. Prosesu	: 0047/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Pena prizaun fulan 6 no suspende ba tinan 1

Iha 11 Outubru 2018, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu RE hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 29 Marsu 2018, maizumenus tuku 20.00 lokraik, arguidu ho lezada diskute malu, wainhira lezada fila hosi misa no hase arguidu katak "*nusa mak la ba misa,*" no arguidu basa dala ida iha lezada nia hasan parte loos no rezulta lezada sofre moras iha hasan. Kazu ne'e anexa mós ho relatóriu médiku husi Pradet no fotografia husi Polísia-VPU.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penál to' o tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Durante julgamentu, arguidu konfesa faktus hotu iha akuzasaun, arguidu deklara katak arrepende ona nia hahalok. Arguidu servisu hanesan to'os-na'in, laiha rendimentu fíksu kada fulan no iha oan nain 1. Arguidu promete ba tribunál katak sei la-komete tan krime hasoru lezada ka ema seluk iha futuru no deklara katak depoisde akontesimentu ne'e diak malu kedas ho lezada no agora moris hamutuk nafatin iha uma ida hanesan feen-laen.

Prokuradór husu ba tribunál atu prezinde lezada nia deklarasaun, tanba iha produsaun ba prova arguidu konfesa faktus hotu iha akuzaaun.

Alegasaun finál

Prokuradór haktuir katak arguidu provadu komete krime hasoru lezada nu'udar nia feen no kazu violénsia doméstika barak liu akontese iha Rejiaun Oekusi kompara ho distritu/munisípiu sira seluk. Prokurador reforsa tan katak arguidu halo krime ne'e hasoru nia feen ne'ebé laiha forsa no tuir loloos arguidu mak tenke protégé lezada. Tanba ne'e husu ba tribunál atu aplika pena tuir artigu 145 KP.

Enkuantu defeza haktuir katak arguidu deklara faktus hotu ne'ebé akuza ba arguidu, arrepende ona nia hahalok no promete sei la komete tan krime hasoru lezada iha futuru, arguidu iha oan nain ida no laiha rendimentu fixu kada fulan. Tanba ne'e husu ba tribunál aplika pena ne'ebé kmaan ba arguidu.

Desizaun

Depoisde avalia faktu sira ne'ebé prodús durante julgamentu, tribunál prova katak arguidu provadu komete krime hasoru lezada. Bazeia ba faktu provadu hirak ne'e tribunál kondena arguidu ho pena prizaun fulan 6 no suspende ba tinan 1.

17. Krime ofensa ba integridade fízika simples ho natureza violénsia doméstika

Nú. Prosesu	: 0040/17.OEBCN
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Calisto Tout
Tipu pena	: Pena admoestasaun

Iha 19 Outubru 2018, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MB hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 29 Agosto 2017, maisumenus tuku 09.00 dader, arguidu basa dala ida iha lezada nia ibun no kauza lezada sofre moras. Kazu ne'e anexa mós ho relatóriu médiku husi Centru Saude Baocnana no fotografia husi Polisia-VPU.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penál to'o tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Durante julgamentu, arguidu konfesa faktus hotu iha akuzasaun, arguidu deklara katak arrepende ona nia hahalok. Arguidu servisu hanesan to'os-na'in, laiha rendimentu fiksi kada fulan no iha oan nain rua. Arguidu promete ba tribunál katak sei la-komete tan krime hasoru lezada ka ema seluk iha futuru, diak malu ona ho lezada no agora moris hamutuk iha uma ida hanesan feen-laen. Arguidu mós deklara katak liuhosi julgamentu ne'e sei sai lisaun ida ba arguidu atu hadia nia a'an iha futuru.

Prokuradór husu ba tribunál atu prezinde lezada nia deklarasaun, tanba iha produsaun ba prova arguidu konfesa faktus hotu iha akuzasaun.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian, tuir loloos arguidu mak proteze lezada, maibé pela kontrariu arguidu mak komete fali krime hasoru lezada. Tanba ne'e husu ba tribunál atu aplika pena tuir artigu 145 KP.

Enkuantu defeza haktuir katak arguidu konfesa faktus hotu iha akuzasaun, arrepende ona nia hahalok no arguidu nia idade sei nurak no iha tempu atu hadia nia a'an iha futuru. Tanba ne'e husu ba tribunál aplika pena ne'ebé adekuadu ba arguidu.

Desizaun

Depoide avalia faktu sira ne'ebé prodús durante julgamentu, tribunál prova katak arguidu provadu komete krime hasoru lezada. Bazeia ba faktu provadu hirak ne'e, tribunál konklui prosesu ne'e no kondena arguidu ho pena admoestasaun.

18. Krime ofensa ba integridade fízika simples

Nú. Prosesu	: 0085/17.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Omologa pedidu dezisténcia keixa

Iha 22 Outubru 2018, Tribunál Distritál Oekusi prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Felixisto Colo Nato hasoru lezadu Jaime Mauno Coa (tinan 11), iha Suku Usitaco Sub-distritu Nitibe, Distritu Oekusi.

Akuzasaun Prokuradór

Prokuradór akuza katak iha 28 Abril 2017, maizumenus tuku 18.00 lokraik, arguidu tebe dala ida iha lezadu nia kanotak, tebe dala ida iha lezadu nia kanuruk no rasta lezadu ba rai no rezulta lezadu sofre moras. Aktu ne'e akontese wainhira lezadu ba ke'e aifarina isin iha arguidu nia to'os no la fô hatene arguidu. Kazu ne'e anexa mós ho relatóriu médiku husi Ospital Referral Oekusi no fotografia husi Polisia-VPU.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penál too tinan 3 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, lezadu ne'ebé representa husi nia inan Maria Suni hakarak dada fali nia-keixa tanba sira dame malu ona ho arguidu. Arguidu konkorda ho pedidu ne'e nune'e lezadu ne'ebé representa hosi nia inan husu ba tribunál atu dezisté keixa hasoru arguidu.

Alegasaun final

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba akordu hosi parte rua no pedidu dezisténsia hosi lezadu, tribunál konklui prosesu ne'e no omologa akordu dame entre parte sira no husu ba arguidu atu labele repete tan hahalok hanesan iha futuro.

19. Krime kondusaun sein karta

Nú. Prosesu	: 0020/18.OESTR
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Pena multa

Iha 31 Outubru 2018, Tribunál Distritál Oekusi prezide julgamentu leitura sentensa ba krime kondusaun sein karta ne'ebé envolve arguidu Nicodemos Coa, João Coa, Julio Neno, Lorenzo Colo, Marciano Falo no Marcos Sasi hasoru Estadu RDTL, iha Suku Costa Sub-distritu Pante-makassar, Distritu Oekusi.

Akuzasaun Prokuradór

Prokuradór akuza katak iha 30 Outubru 2018, maizumenus iha tuku 11.00 dader, arguidu sira ida-idak lori motor iha dalan públiku hosi Palaban atu ba Merkadu Numbey. Wainhira polísia pasa-revista no hetan katak arguidu sira laiha karta kondusaun.

Prokuradór akuza arguidu sira kontra artigu 207 Kódigu Penál kona-ba krime kondusaun sein karta ho moldura penál too tinan 2 ka multa.

Produsaun ba prova sira

Iha julgamentu, arguidu sira konfesa faktus hotu iha akuzasaun, arguidu sira deklarata katak arrepende ona sira nia hahalok no foin primeiravés mai hatan iha tribunál. Arguidu sira haktuir tan katak hahalok hanesan ne'e ladiak no kontra lei Timor. Arguidu sira servisu hanesan to'os na'in laiha rendimentu fiksi kada fulan no arguidu sira hatene lori motor maizumenus tinan 1 to'o tinan 2 ona.

Prokuradór husu ba tribunál atu prezinde testemuña nia depoimentu, tanba arguidu sira konfesa faktus hotu iha akuzasaun.

Alegasaun final

Prokuradór konsidera arguidu sira provadu komete krime kondusaun sein karta bazeia ba konfisaun arguidu sira tanba iha audénsia arguidu sira rasik konfesa faktus sira hotu iha akuzasaun. Prokuradór mós hanoin katak kazu krime kondusaun sein karta kada fulan sempre akontese no husu ba tribunál atu kondena arguidu sira tuir pena ne'ebé hakerek ona iha artigu 207 KP atu nune'e futuru bele halo prevensaun ba ema seluk.

Enkuantu defeza haktuir katak arguidu konfesa faktus hotu iha akuzasaun, arrepende ona sira nia hahalok no arguidu sira foin primeiravés mai hatan iha tribunál. Defeza haktuir tan katak nia kliente sira promote ona sei lakomete tan krime iha futuru no julgamentu ohin loron sei sai lisaun ba sira atu lori motor tenke iha karta kondusaun. Arguidu sira hot-hotu servisu hanesan to'os na'in no laiha rendimentu fiksi kada fulan. Tanba ne'e husu ba tribunál atu aplika pena ne'ebé kmaan ba arguidu sira tuir ida-idak nia sala.

Desizaun

Depoizde avalia faktus hotu, tribunál konsidera arguidu sira provadu komete krime kondusaun sein karta. Bazeia ba faktus provadu sira ne'e, tribunál konklui prosesu ne'e no kondena kada arguidu ho pena multa US\$60.00 ne'ebé sei selu 0,50 sentavus kada loron durante loron 120. Tribunál mós fiksa pena alternativa ba arguidu sira hotu durante loron 80 iha prizaun kuandu arguidu sira la selu pena multa refere.

Atu hetan informasaun kompleitu, favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.tl
www.jsmp.tl